

# Jadid

adabiy, ilmiy-ma'rifiy va ijtimoiy haftalik gazeta

## ZABARDAST SO'Z ZARGARI



Alisher Navoiy,  
Maxtumquli va  
Ibroym Yusupov  
turkiy xalqlar  
she'riyatining  
payg'ambar nafasi  
shoirlaridir.

Qaysin QULIYEV

(5-sahifada o'qing.)

### MA'RIFAT ULASHIB

Oxirgi marta qachon gulxan atrofida gurlung qilgan-siz? Eslay olasizmi? Agar yodingizda bo'lsa, sizga havasim keladi. Sababi, mening esimda yo'q, chunki o'n yil, yigirma yil emas, juda ko'p bo'lgan bunday zavqni tuymaganimga.

Ha, gulxan atrofida to'planib, dildan suhbat qurish kishiga betakror zavq, huzur-halovat beradi. Tasavvur qiling: tun, atrofini oy nuri yoritib turibdi, qayerdandir chigirtkaning chirillashi eshitildi, o'rtada gulxan...



## GULXAN RANGLARI

Darvoqe, gulxanning rangiga, hidiga e'tibor berganmisiz? Gulxan necha xil rangda tovlanadi? Qizil deysizmi? Yo'q, unda faqat qizil emas, sariq, ko'kish, hatto oq va yana qanaqadir ranglar bor. Biz kamalak rangiga oshufta bo'lamiz, ammo gulxan rangiga ahamiyat bermaymiz. Holbuki, gulxanning sonsiz ranglari, ularning tovlanishi, raqqosalar kabi o'ynoqlab, jilvalanib yonishi naqadar go'zal, naqadar fusunkor. Gulxanning isini aytmaymiz! Biron marta bo'lsin hidlaganmisiz? Bu hidni hech narsa bilan tenglashtirib bo'lmaydi! Gulxanning chirs-chirs yonishi-chi? Qandaydir musiqani

yodingizga solmaydimi?! Bular qalbga orom, dilga rohat, asabga malham beradi.

Go'zallik deganda beixtiyor gulni tasavvur qilamiz. Chunki gul – go'zallik, nafasat ramzi. Biroq astoydil go'zallik istagan odam hamma narsadan uni topa oladi, barcha mavjudotda ko'radi go'zallikni.

Men yaqinda gulxan go'zalligidan bahramand bo'ldim, uning zavqiga oshno, maftun bo'ldim. Uning jilva qilib, eshilib, to'lg'anib yonishiga termulib o'tirarkanman, ozgina fursatga bo'lsa-da, barcha g'am-u tashvishlarni unutmam, vujudimdagi jamiki g'uborlar ko'tarildi, gulxanning ta'riflab bo'lmay darajadagi tafti ru-

himni tozaladi, juda yengil tortdim. Eng muhimi, oltmish yillar ortga qaytdim, yon-atrofimda o'tirgan talaba yigit-qizlar yoshidagi davrimga tushdim go'yo. Ishonasizmi, o'zimni ulug' yoshdagi kishi emas, yigirmaga borib-bormagan, tog'ni ursa talqon qiladigan, qadamidan o't chaqnaydigan yigit kabi seza boshladim. Go'yo ko'zlari yonib turgan yigit-qizlar o'rtasida yoshi bir joyga borgan "yigit" o'tirardi. Ular ham asta-sekin meni tengqurlari kabi ko'ra boshladi. Va davramiz tengdoshlar gurungiga aylandi.

(Davomi 2-sahifada.)

### IBRAT

## BAXT EL BILAN BIRGA TO'KIS

– Men tadbirkor sifatida yurtimizda bu borada yaratib berilgan imkoniyatlardan to'liq foydalanib kelyapman, – deydi Toshkent shahridagi Astrobod mahallasida joylashgan "Nova school" nodavlat ta'lim muassasasi rahbari Zebo Mo'minova. – Avvallari qo'limiz bog'liq, oyoqg'imiz tushovli edi, zig'irday insofi bor odam buni to'la-to'kis e'tirof etadi. Biroq alloma adibimiz Asqad Muxtor yozganidek: "Naqshin olmani cho'qib, uning ichidan qurt qidiradigan" toifa ham borki, ularning ijtimoiy tarmoqlarda ko'ngling jo'shib bildirgan fikrlariga nisbatan kinoyalik munosabatlariga ham duch kelasan. Garchi bu g'alamislik nafsoniyatimizga tegsa-da, biz o'z fikrimizda sobitmiz. Chunki hayotdan, jamiyatdan va davlatimizdan rizoligimizni izhor qilishga o'zimizni nafaqat haqli, balki burchlimiz deb hisoblaymiz.

Biz ham aslida Zeboni aynan ana shu saboti, qat'iyati, mehnatsevarligi, shijoati va eng asosiysi, ma'rifati sabab yo'qlab bordik. Uning ta'lim va amaliyotni barobar olib borishga doir asosli



mulohaza va g'oyalari o'zi tashkil etgan xususiy maktabda birin-kekin ro'yobga chiqayotganiga guvoh bo'ldik.

Muhtasham maktabga kiraverishdayoq, "Qaniydi yurtimizdagi hamma bolalar ham ana shunday binolarda ilm o'rgansa", degan fikr o'tdi xayolimizdan. Zamonaviy sinf xonalari, sport zali va o'quvchilarga yaratilgan sharoitlarni birma-bir ko'rsatayotgan Zebo Mo'minovaning omdoni o'quvchilarga havas qildik. Ichki devorlarning ranglaridagi uyg'unlik, modern uslubida yasalgan parta va kursilar, maxsus shax-

mat stollari, so'nggi rusumdagi laboratoriya jamlanmalari, elektron doskalar, 8-10 kishiga mo'ljallangan oynavand lift...

Tadbirkor bu jihozlarni Turkiyadan olib kelganini aytdi. Uning har bir detalga malakali dizayner kabi ahamiyat bergani odamni hayratga soladi. Shaxmat mashg'ulotlari xonasining to'liq oynavand tomonidan ko'chada g'iz-g'iz o'tib turgan avtoulovlar harakati va tabiatning jonli tasviri yaqqol ko'rinib, kishi ruhiga sokinlik bag'ishlaydi.

– O'n bir yil oldin Yunusobod tumanida maktabgacha tayyor-

lov o'quv kursi tashkil qilish maqsadida besh xonali uy sotib oldik, – deydi Zeboxon. – Uni ta'mirdan chiqarib, o'n nafar o'qituvchi-pedagogni kursimizga jalb qildik. Bolalarini kun davomida bizga qoldirib ketishga majbur bo'layotgan ayollarning sharoitini hisobga olib, "Onalar soati" bo'limini ochishimizga to'g'ri keldi. Keyinchalik ana shu ayollar: "O'quv markazingizni xususiy bog'chaga aylantirangiz yaxshi bo'lardi", deb iltimos qilishdi.

(Davomi 4-sahifada.)

### OYINA

## "JAMIYATI XAYRIYA" DAN "EL-YURT UMIDI" GACHA

O'z davrining renessans beshiklari bo'lgan Bag'dod, Ma'mun akademiyasi kabi mashhur ma'rifat maskanlariga dunyoning turli burchaklaridan ziyo izlab tolibi ilmlar oqib kelishgani bugun barchamizga ayon. Ajdodlarimiz o'z navbatida ilm-fan taraqqiy etgan markazlarga borib tahsil olishgan, taqdiqlarni amalga oshirishgan. Yuz yil avvalgi gazetalarni varaqlaganda bobolar an'anasini davom ettirgan jaddilar ham yoshlarni chet ellarda o'qitish, ayniqsa, Yevropa ilm-fani yutuqlari bilan tanishtirish masalasiga alohida e'tibor qaratganiga guvoh bo'lamiz. Ular millatning taraqqiy yo'lini yoshlarni ilmiy qilish, texnika va ilm-fan taraqqiyoti, turli ixtirolardan xabardorlikda, deb bilishadi.



Shu maqsadda 1909-yilda Toshkentda tuzilgan Turkiston jaddilarining "Jamiyati xayriya" tashkiloti tomonidan talabalarni xorijga o'qishga jo'natish harakati boshlanadi. O'sha yili Buxoro shahrida tuzilgan "Tarihiy atfol" jamiyati ham Fitrat, Usmonxo'ja Po'latxo'ja o'g'li, Ato Xo'ja, Mazhar Burxonov kabi ko'pgina yoshlarni Istanbulga o'qishga yuborgan. 1922-yilga kelib Fitrat, Botu va Cho'p'poning g'oyaviy boshchiligidagi talabalarning oliy ta'lim olishiga sharoit yaratish, ular chet ellarda duch kelishi mumkin bo'lgan qiyinchiliklarni yengillatish maqsadida "Ko'mak" uyushmasi tashkil qilinadi. Ma'lumotlarga ko'ra, Germaniyaga o'qishga jo'natilgan mahalliy yoshlar uchun Buxoro hukumati tomonidan 125 ming dollar pul, Yevropada qiymati baland hisoblangan noyob qorako'l terilari yuboriladi va bu "iona" talabalarning 1924-yilgacha bemalol o'qishi uchun kifoya qilgan.

Shuningdek, ular Berlinda V.Geysbergstrit ko'chasidagi 39-uyini ham sotib olib, turkistonlik talabalar uyiga – yotoqxonaga aylantirishadi.

Ushbu uyushma bir yilgina faoliyat yuritgan bo'lsa-da, 200 nafardan ortiq yoshlarni xorijiy mamlakatlarga o'qishga yuborishga muvaffaq bo'ladi. O'sha taloto'p zamonlarda, ocharchilik va yo'qchilik hukm surgan davrda yuzlab millat yoshlarini xorijga o'qishga yuborish va ularga homiylik qilish nafaqat muvaffaqiyat, balki ulkan jasorat edi. Afsuski, Vatanga xizmat qilish orzusida bu tashkilotni tuzgan millat oydinlari hamda el-yurt umidi bo'lgan tolibi ilmlarning aksariyati keyinchalik qatag'onga uchragan.

Bugun ham yurtimizning dovrig'ini dunyoga tanitish, uning iqtisodiy qudratini oshirib, islohotlar ko'lamini yanada kengaytirishda ilm-fanning, sifati ta'limning o'rni beqiyos. Ayniqsa, respublikamizning chekka hudud-

larida istiqomat qiluvchi yosh iqtidor egalarni izlab topish va tanlash, ularning xorijdagi nufuzli muassasalarda ta'lim olishini ta'minlash maqsadida "El-yurt umidi" jamg'armasi tashkil etilgan.

Jamg'arma 1997–2003-yillarda "Umid", keyinroq "Iste'dod", "Ustoz" nomlari ostida faoliyat yuritgan. Bu tashkilotlar ham yoshlarning xorijda ta'lim olishiga ko'maklashishga asosiy e'tibor qaratgan. Hozir ham islohotlar mohiyatini teran anglaydigan, mamlakatga yangicha ruh olib kiradigan, zamonaviy dunyo bilan muloqotga kirish oladigan kreativ mutaxassislariga ehtiyoj tobora ortib bormoqda. Shu bois ham Prezidentimiz tashabbusi bilan 2018-yili yuqorida tilga olingan muassasa "El-yurt umidi" jamg'armasi sifatida qayta tashkil qilinib, vakolat va imkoniyatlari kengaytirildi.


(Davomi 3-sahifada.)

### TAQDIMOT

Gazetamizning o'tgan sonida Misr Arab Respublikasida buyuk adibimiz Abdulla Qodiriyning "O'tkan kunlar" romani nashr etilgani haqida xabar bergan edik. Shubhasiz, milliy adabiyotimiz durdonalaridan sanalgan ushbu asarning arab tiliga tarjima qilinishi madaniy hayotimizda muhim voqea hisoblanadi.

Qohira shahrida bo'lib o'tgan taqdimotda ushbu mamlakat adabiy jamoatchiligi vakillari o'zbek xalqining boy madaniyati va qadriyatlarini yorqin tasvirlagan mazkur roman Ayn-Shams va Luksor universitetlari professori, taniqli adib va tarjimon Muhammad Nasr al-Jibaliy tomonidan arab tiliga katta mahorat bilan o'g'irilganini e'tirof etishdi. Shu o'rinda mamlakatimizning Misr Arab Respublikasidagi elchixonasi mutasaddilari, xususan, elchixonas mas'ul xodimi Otobek Alimov bunday savobli ishga bosh qo'shib, mutarjimga har tomonlama ko'mak berganini ham alohida ta'kidlash lozim.

Quyida Abdulla Qodiriy uy-muzeyi direktori, O'zbekistonda xizmat ko'rsatgan madaniyat xodimi Xondamir Qodiriyning arab tilidagi "O'tkan kunlar" romaniga yozgan so'zboshisini e'tiboringizga havola qilamiz.



TAHRIRIYAT

## MAKON VA ZAMON TANLAMAYDIGAN NAVO



Maqolaning avvalida Abdulla Qodiriy yashab, ijod qilib o'tgan tarixiy davr haqida qisqagina ma'lumot berib o'taman.

Abdulla Qodiriy 1894-yil Toshkentda tug'ilganda Qo'qon xonligi chor Rusiyasi tomonidan istilo etilib, Turkiston mustamlaka holda yashayotganiga 18 yil bo'lgan, bu davr ichida Rusiya bu yerdagi barcha boyliklarni o'z qo'l ostiga olgan edi. U bu vaqt davomida sanoat va xo'jalik mollari bilan Turkiston bozorlarini to'ldirishga va o'zining to'qimachilik sanoati uchun g'oyat zarur bo'lgan mahalliy paxtachilik sanoatiga katta e'tiborini qaratgan edi.

Mahalliy boshqaruvning eng yuqori pog'onalarida ruslar turib, faqat diniy e'tiqod, shariat qonun-hukmlari, musulmon o'quv ta'limi, vaqf yerlari, xususiy mulk daxsiz qolgan edi.

1917-yilda esa Lenin boshchiligidagi sho'ro kommunistlari chor Rusiyasida davlat to'ntarishi yasab, 7-noyabr kuni hukumat tepasiga keladi.

(Davomi 2-sahifada.)













